

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U TEŠNJU
Broj: 39 0 K 076962 25 K
Dana: 29.08.2025. godine

U IME FEDERACIJE BIH!

Općinski sud u Tešnju, sudija Besima Ajanović, uz sudjelovanje zapisničara Hadžan Ninele, u krivičnom predmetu optuženog O.M., sin H., R. bb, općina Tešanj, radi krivičnog djela "Krivotvorenje isprave" iz člana 373. stav 2. u vezi sa stavom 1. KZ F BiH, povodom optužnice Kantonalnog tužilaštva ZE-DO kantona Zenica broj: T04 0 KT 0058872 24 od 21.03.2025. godine, nakon održanog ročišta za razmatranje izjavi o priznanju krivnje i izricanja krivično pravne sankcije, u prisutnosti tužitelja Kantonalnog tužilaštva ZE-DO kantona Redžo Delić i optuženog O.M. lično, dana 26.08.2025. godine donio je i javno objavio sljedeću:

P R E S U D U

Optuženi:

O.M., sin H. i majke Z. rođene S., rođen 28.03.1979. godine u T., gdje je i nastanjen u mjestu R. bb, sa završenom SSS, po zanimanju precizni mehaničar, po narodnosti Bošnjak, državljanin BiH, JMB: ..., *neosuđivan*,

K R I V I J E

Što je:

U mjesecu aprilu 2024. godine u Tešnju, prilikom predaje obrasca izvještaja o privremenoj spriječenosti za rad redni broj: 1089067209 od 24.04.2024. godine, izdata od strane Doma zdravlja Tešanj firmi d.d. „Mann+Hummel“, preinačio pravu ispravu s ciljem da je upotrijebi kao pravu, na način da je sam prepravio datum na istoj, upisujući 26.04.2024. godine kao dan zaključenja bolovanja, iako je znao i bio svjestan da je od strane porodičnog doktora bolovanje zaključeno sa danom 25.04.2024. godine, te na taj način preinačava pravu javnu ispravu, a što je i htio,

Dakle, pravu javnu ispravu preinačio i upotrijebio kao lažnu,

Čime je počinio krivično djelo „Krivotvorenje isprave“ iz člana 373. stav 2. u vezi sa stavom 1. KZ F BiH, pa mu se primjenom navedenih zakonskih odredaba i na osnovu odredaba člana 49. i 62. KZ FBiH, izriče

UVJETNA OSUDA

Kojom se optuženom O.M., sin H., R. bb, općina Tešanj, za krivično djelo "Krivotvorenje isprave" iz člana 373. stav 2. u vezi sa stavom 1. KZ F BiH, utvrđuje kazna zatvora u trajanju od šest (6) mjeseci, a koja kazna se neće izvršiti ukoliko optuženi u roku od 1 (jedne godine) računajući od dana pravosnažnosti presude ne učini novo krivično djelo.

Obavezuje se optuženi da na ime krivičnog postupka-paušala plati iznos od 50,00 KM u roku od 30 dana od dana pravosnažnosti presude.

U smislu člana 78. KZ BiH radi uništenja trajno se oduzima falsifikovan Izvještaj o privremenoj spriječenosti za rad na ime O.M. izdata od Doma zdravlja Tešanj od 24.04.2024. godine, a koji su dostavljeni od strane firme MANN+HUMMEL d.o.o Tešanj, jer su upotrijebljeni za učinjenje krivičnog djela.

O b r a z l o ž e n j e

Kantonalno tužilaštvo ZE-DO kantona Zenica optužnicom broj: T04 0 KT 0058872 24 od 21.03.2025. godine, optužilo je optuženog O.M. , sin H. , R. bb, općina Tešanj, radi krivičnog djela djela "Krivotvorenje isprave" iz člana 373. stav 2. u vezi sa stavom 1. KZ F BiH, počinjenog na način, vrijeme i mjesto kako je to поближе opisano u optužnici, temeljeći optužbu na dokazima koji su predloženi u optužnici.

Sudija za prethodno saslušanje ovog suda potvrdio je ovu optužnicu dana 02.04.2025. godine.

Na ročištu za izjašnjenje o krivnji optuženi, nakon što je u smislu odredaba člana 13. ZKP-a, poučen o svojim pravima izjavio je da je izvršio radnje na način i vrijeme kako je to opisano u dispozitivu ove presude, da je izvršio predmetno krivično djelo i da priznaje krivnju.

Nakon razmatranja izjave o priznanju krivnje uvjerenje suda je da je do priznanja krivnje došlo dobrovoljno, sa razumijevanjem da je optuženi svjestan svih posljedica i obaveza koje proističu iz priznanja krivnje te da postoji dovoljno dokaza o krivnji optuženog, pa je sud i prihvatio izjavu o priznanju krivnje.

Sud je izvršio uvid u materijalne dokaze prikupljene tokom istrage, i to: Zapisnik o saslušanju svjedoka Ć. A. PS Tešanj broj 08-02-11/1-17-210/25 od 05.03.2025. godine, Duplikat Izvještaja o privremenoj spriječenosti za rad na ime O.M. izdata od Doma zdravlja Tešanj od 24.04.2024. godine, Ovjerena kopija evidencije o oboljenjima iz zdravstvenog kartona na ime O.M., Ovjerena kopija nalaza i ocjene od 24.04.2024. godine, Dostavljena dokumentacija od strane MANN+HUMMEL d.o.o Tešanj od 19.03.2025. godine sa prilogom: Izvještaj o privremenoj spriječenosti za rad na ime O.M. izdata od Doma zdravlja Tešanj od 24.04.2024. godine, (falsifikovana), Izvod iz kaznene evidencije za optuženog O.M. PS Tešanj od 04.02.2025. godine.

Priznanjem optuženog koje je priznanje je potkrepljeno materijalnim dokazima nesumnjivo proizilazi da je optuženi u mjesecu aprilu 2024. godine u Tešnju, prilikom predaje obrasca izvještaja o privremenoj spriječenosti za rad redni broj: 1089067209 od 24.04.2024. godine, izdata od strane Doma zdravlja Tešanj firmi d.d. „Mann+Hummel“, preinačio pravu ispravu s ciljem da je upotrijebi kao pravu, na način da je sam prepravio datum na istoj, upisujući 26.04.2024. godine kao dan zaključenja bolovanja, iako je znao i bio svjestan da je od strane porodičnog doktora bolovanje zaključeno sa danom 25.04.2024. godine, te na taj način preinačava pravu javnu ispravu, čime su se u radnjama optuženog stekla sva bitna obilježja bića krivičnog djela „Krivotvorenje isprave“ iz člana 373. stav 2. u vezi sa stavom 1. KZ F BiH, pa kako je optuženi bio svjestan svog djela i htio njegovo izvršenje, to je sud optuženog oglasio krivim i osudio kao u izreci ove presude.

Prilikom odlučivanja o vrsti i visini krivično pravne sankcije, sud je cijenio na strani optuženog sve okolnosti koje su od značaja za odmjeravanje kazne. Od olakšavajućih okolnosti sud je našao da optuženi priznaje izvršenje djela koje mu se stavlja na teret, da pokazuje iskreno kajanje, da je nezaposlen i da do sada nije osuđivan, otežavajuće okolnosti sud nije našao, pa imajući u vidu navedene olakšavajuće i uz odsustvo otežavajućih okolnosti sud je optuženom izrekao uvjetnu osudu kojom je optuženom utvrdio kaznu zatvora u trajanju od 6 (šest) mjeseci, koja kazna se neće izvršiti ukoliko optuženi u roku od jedna (1) godina dana od dana pravosnažnosti presude ne učini novo krivično djelo, smatrajući da je ova krivično pravna sankcija adekvatna težini krivičnog djela kao i ličnosti učinioa i da će se sa izrečenom kaznom postići opšta svrha kažnjavanja, kako sa aspekta generalne tako i specijalne prevencije.

U skladu sa odredbama člana 199. ZKP FBiH optuženi se obavezuje da na ime troškova krivičnog postupka- paušala plati iznos od 50,00 KM u roku od trideset (30) dana od dana pravosnažnosti presude..

U smislu člana 78. KZ BiH radi uništenja trajno se oduzima falsifikovan Izvještaj o privremenoj spriječenosti za rad na ime O.M. izdata od Doma zdravlja Tešanj od 24.04.2024. godine, a koji su dostavljeni od strane firme MANN+HUMMEL d.o.o Tešanj, jer su upotrijebljeni za učinjenje krivičnog djela.

Na osnovu svega navedenog odlučeno je kao u dispozitivu presude.

PRAVNA POUKA:

Protiv ove presude dozvoljena je žalba
Kantonalnom sudu u Zenici putem ovog suda
u roku od 15 dana od dana prijema presude.

SUDIJA

Besima Ajanović